



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

11. Kalenderwoche – ab 15. März 2009

Weisheid is schwär

Nee, werglisch - isch bin villeischd nisch de greeßde geisdische Leischde unnor Goddes Himmelszeld, abor isch bin wissbegierisch un gelährisch. Ooch im Fernsähor gugge isch mir gerne so Sendung an ibor de Wissnschafd un de Forschung un so. Isch kann mir das, was da komm dud, zwar nisch lange märkn, abor das dud ja ab un zu ma widdor offdauchn. Ob das nu de Dellfiene bedreffn dud odor was dähn Urgnall bedreffn dud odor de Vochlgribbe... - nee, was da immor komm dud, kannsde dir einfach nisch alles wordwerdlich märkn. Zumal, wensde ehm wie isch e wissnschafdlichor Ammadöhr bisd. Isch hab noch nie een Hörsaal von inne gesähn!

Desweeschn bevorzuche isch ja ooch fiehr meine bersehnliche wissnschafdliche Bedädischung de Fillesofie. Ja, de Fillesofie dud sisch grade fiehr dähn Hobby- un Heimwissnschafdlor besonders gud eischnen. Noch dazu , wensde womeeglich grade krank un beddlägorsich bisd. Fiehr de Fillesofie brauchdsde ja nischd weidor als wie dein Kobb. Da brauchdsde kee großes Labohr un keene Forschungssaddeliddn... un so, da reischds ehm, wensde so rumlieschsd odor rumleefsd un das Gehirne einschaldn dusd. Un dann mussde ehm bloß noch fillesofiern.

De Fillesofie is ja de Wissnschafd von dor Weisheid. Un was da fiehr misch besondersch gindisch is, das is, dass ehm de Weisheid mei Schbezjalgebiet is. Ja, das dud schon manschma frieh losgehn - wenn isch in dähn Schbieschl gugge un dann so denkn due: Mänsch, Ede...!

Isch sache immor "Ede" zu mir, wensch misch mid mir vorm Schbieschl unnorhalde!

Also... - Mänsch, Ede - due isch dann denkn - du bisd werglisch schon sähr wise, wenn nisch schon seldsamorweise!

Manschma denk isch ooch einfach: Mänsch, Ede - was bisde ald gewordn! Abor Aldor un Weisheid dun ja eng zusammenhäng! Eens is ohne das annre nisch meeschlich.

Wobei - an dähr Schdelle habbsch dann ooch meine Zweifl. Abor dor Zweifl is ja eene anerkannde Medohde in dor Fillesofie. Jednfalls due isch da manschma zweifln, ob mor werqlisch mid zunehmenden Aldor immor weisor wern dud. Dor zunehmende Mond wird immor hellor, ohkee, das is so - abor beim Mänsch - wern mir werqlisch immor hellor sozusachn?

Also, wensch mir da meine Gudste angugge... nee, hellor oder weisor dud die nisch wern. Ehor rundlich un finsdoror. Wie die misch manschma finsdor anguggn dud, bloß weil isch meine Gehirndädischkeid mid e baar Bierschn in Schwung gebrachd hab... ! Sähr finsdor!

Nascha, abor ooch was misch bersehnlich bedreffn dud... bis vor wenische Jahre, wensch da so angefang hab, misch fillesofisch zu bedädischn... so vorm Schbieschl odor offm Kranknlachor, da hab isch immor so e weises Gefiehl gehabbd, so een helln Schein. Isch war ja off dor Seide von de Sieschor dor Geschischde! Abor de Geschischde dud ehm leidor nisch in meinor Umgäbung sieschn. Wensch das dann säh, fiehl isch misch nisch mähr wise, ehor dummorweise.

Eduard Sachsenmeyer